

Sco pli baul agl Indoor Festival

Il publicum digl Indoor Festival (foto) 2009 ha festivau sco ei s'auda. Suenter ina liunga pausa d'endisch onns ha quella fiasta in revival. Ils organisaturs speran ch'il publicum possi era a caschun dalla dieschavla ediziun - che ha liug questa fin d'jamna - saltar, cantar e festivar da buna luna. La finamira dil comite d'organisaziun ei da cuntinuar cugl Indoor Festival e surdar cul temps l'organisaziun en mauns pli giuven. (fmr/sr)

Pagina 4

Revival digl Indoor Festival a Mustér

Venderdis e sonda, ils 6 e 7 da matg vegn il retuorn digl Indoor Festival cun musica live festivaus el Center Fontauna a Mustér. Suenter ina pausa dad 11 onns daventa la Cadi puspei il liug da sentupada per fans dalla musica. Siat bands dalla Svizra e Tiaratudestga vegnan a procurar per atmosfera da fiasta.

SUSI ROTHMUND/FMR

La dieschavla ediziun digl Indoor Festival ha liug suenter ina pausa dad endisch onns. «Superstars mundials savein nus buca prestar d'engaschar. Igl ei denton reussiu da metter ensemen in program cun fetg bunas bands dalla Svizra e Tiaratudestga e nus selegrein da finalmein puspei saver organisar ina fiasta per hosps da lunsch e da maneivel», aschia *Florian Zanin*, il president dil comite d'organisaziun digl Indoor Festival.

Rap e Rock

La honor da sepresentar il venderdis sera, all'entschatta dil festival ha la suletta gruppa indigena, la formaziun entuorn *Pascal Gamboni* e *Dario Hess*. La Pascal Gamboni Combo Crassira vegn a celebrar la musica da rock e

country cun canzuns romontschas ed inglesas. Suenter suondan cun Saint City Orchestra quater vuschs e quater ghitaras. La band da S. Gagl ei enconuschenta per melodias dad Irish Rock. Per ina buna finiziun dil venderdis sera procura la gruppa Saltatio Mortis dalla Tiaratudestga. Ils davos quater albums da quella ein setschentai en Tiaratudestga directamein sin plaz 1 dils album-charts. Dapi varga 20 onns sepresenta quella fuormaziun da siat musicists plein energia sin grondas tribunas dil mund. «Saltatio Mortis vala buc senza motiv sco ina dallas meglieras bands dalla Tiaratudestga che fan musica live», scrivan ils organisaturs en in communicau da medias.

D'Aurelius & Sirius enfin 257ERS

Il program dalla sonda entscheiva cul concert d'Aurelius & Sirius. Ils rappunzs grischuns

ein enconuschents ella scena da rap e han publicau igl onn vargau lur emprem album communabel «FlimsLaaxStaderas». Il cantatur da Lucerna, *Damian Lynn*, vegn a se-presentar sco secund la sonda e quei cun semperverds che pudessan - tenor ils organisaturs digl Indoor Festival - era vegnir ord in quartier modern da Londra. Il program dalla sonda cuntinua cun Sondaschule, ina gruppa da Ska Punk dalla Tiaratudestga. A fin va il dieschavel Indoor Festival cul concert dalla gruppa da rappunzs 257ERS dalla Tiaratudestga che presenta il niev album ch'ei cumpariu l'entschatta avrel.

Prevendita ed ulteriuras informaziuns:
www.indoorfestival.ch

«Per la giuventetgna e per restar giuvens»

Atgnamein havess il dieschavel Indoor Festival a Mustér duii haver liug igl onn vargau suenter ina pausa da diesch onns. Pervia dallas restricziuns en connex culla pandemia ha quel denton stuiu vegnir annullaus e stuschaus sin uonn. Venderdis e sonda eis ei aschi lunsch.

SUSI ROTHMUND/FMR

La FMR ha discurrei cun *Florian Zanin* davart il vargau, il revival ed il futur digl Indoor Festival. El ei in dils iniziants dil festival e presidescha dapi l'emprema ediziun il comite d'organisaziun digl Indoor Festival el Center Fontauna a Mustér.

Organisar in event sco igl Indoor Festival ei tut auter che sempel durant in temps malguess sco quel da pandemia. Igl onn vargau haveis Vos organisau quel «pil giat» e stuiu dar giu il fevver. Co ei quei stau d'organisar quella ga, essas insumma semtgai per la fin d'jamna?

Florian Zanin: Igl ei d'entscheiver meins avon cun l'organisaziun ed era uonn eran nus ditg buc propi segirs sch'ei gartegi. Per quei essan nus dublamein cuntents e pli che semtgai silla fin d'jamna.

Pil giat havein nus denton era buc luvrau igl onn vargau. Aschia havein nus giu empau pli pauca lavur d'organisar uonn. Cuntschun da siat bands havevan nus per exempel gia in contract ed ellas ein stadas promtas da vegnir uonn.



FOTO MAD

Pertgei ha ei insumma dau ina pausa aschilunga suenter il novavel Indoor Festival?

Nus havevan fatg in ualti grond deficit e piars la motivaziun da cuntinuar. Ins sa planisar ina fiasta aunc aschi biala cun bunas gruppas, sche la gliend vegn buc gida tut nuot. Uonn va la prevendita dètg bein. Ei ha denton aunc bigliets e nus havessen plascher da massa hospis.

Vos haveis la curascha da cuntinuar e schar reviver il festival. Daco duess ei gartegiar meglia quella ga?

Quater da nov commembers dil comite d'organisaziun ein aunc quels da pli baul. Adina puspei havein nus giu endamen da schar reviver igl Indoor Festival. Avon in onn fuss ei stau la dieschavla ediziun suenter ina pausa da diesch onns e quei ha motivau nus d'ughegiar danovamein. Ins vegn pli vegls e pli perderts e sto buc repeter certs sbagls. Per gl'auter havein nus cun Sedrun Mustér Turissem in fetg bien sponsur che sustegn nus.

Tgei finamiras haveis cul festival e co duei il futur da quel veser ora?

Nus lein metter en pei enzatgei per la regiun e porscher ina biala fiasta. La finamira ei da realisar enzatgei per la giuventetgna e per restar giuvens. Il festival drova cuntinuitad. Co ei vesa ora l'auter onn ei denton aunc empau malguess pervia dallas lavurs da construcziun el Center Fontauna. Sch'ei gartegia – e la populaziun sustegn nus – duei igl endischavel Indoor Festival haver liug il 2023. Cul temps fuss ei bi da saver surdar il festival en mauns pli giuvens.